

四庫全書

集部

欽定四庫全書

集部

夢澤集卷一至三

詳校官中書_臣葉元符

中書_臣劉源溥覆勘

總校官進士_臣朱鈐

校對官編修_臣潘曾起

謄錄監生_臣周敦復

欽定四庫全書

集部六

夢澤集

別集類五

明

提要

臣等謹案夢澤集二十三卷明王廷陳撰廷陳字稚欽黃岡人正德丁丑進士選庶吉士以言事廷杖出知裕州事蹟具明史文苑傳其集一刻於淮安再刻於蘇州此本為其從孫追淳知潁州時所校刻乃第三本也廷陳

少年高第以恃才傲物致放廢終身其器量殊為淺狹至其詩意警語圓軒然出俗則不得不稱為一時之秀王世貞藝苑卮言稱其如良馬走坂美女舞竿五言尤屬長城又稱王稚欽吳明卿之五言律各極妙境專至而有餘朱彞尊靜志居詩話亦謂其音高秋竹色艷春蘭樂府古詩殊多精詣蓋在正嘉之間何景明最為俊逸廷陳之天骨雄秀抑亦

駭乘矣若雜文則藻采太多華掩其實等諸
自鄧無譏無庸深論也乾隆四十六年十月

恭校上

總纂官

臣紀昀臣陸錫熊臣孫士毅

總校

官臣陸

費墀

欽定四庫全書

夢澤集卷一

明 王廷陳 撰

賦

述遠賦

繫南服之靈萃兮領豐慧於方童稽統世之軒崇兮惟哲人焉以降歛翼振而霄舉兮紛齊羽之誰蹤戴殊薦以邇秩兮帝實洞其美衷義嶽立而坎視兮將媒靜乎

遐至中實愠乎攘攘兮詎徒與之求避害命占以吉貢
兮覽蕪蔓焉是艾靡市背而岑間兮曰惟窅乎其內隈
不岌岌而崇兮邈不疊疊而道彼衙衙之侈構兮反予
睇其足羞抗隆棟以締宇兮脩垣遵乎坤隅約蓀蘭使
被椽兮令日月乎當樞苟能真娛以宅志兮是固予心
之所仇重仁而襲義兮障夫塵之累也扁禮而牖智兮
專乎其所事也吾將服貞一以省處兮夫豈惟藝之圃
也括道器以充詘兮固衆兆之所駭也紛悻矚以竚眙

兮欲干僚而僵徊眩厥施而弗竟兮乃各以其膚猜嗟
躁士之本剝兮宜甫趨而忽蹶醜儉夫之懷詭兮乃讐
直而委折傷二者之偕失兮荃茝施審厥居心務却以
基進兮惟欲然裕其所如晦累而冥探兮所以君乎紛
華彼時俗之佻澆兮背繩墨而馳驟予將服正則以恬
守兮虞窘步於歌陬夫朋不可以聲來兮功不可以偶
作疇廢伏而有章兮疇棄耕而能穫亂曰仆不僵兮進
不妍斂神志兮守吾玄有弗據兮孰敢奸匪邃道兮曷

其然

左賦

有序

夢澤子不善官見閔有司黜民乘之坐是拘繫自傷
疾惡反中乃作左賦詞曰

晝晦宵明川停獄行隆冬劇燠六月而冰墮毛不揚石
舉輿升廢輦振韻奮霆無聲羣欣逐臭乃厭蘭芬猜鸞
駭鳳精振飼臬仁躋德跼勁弧射堯恬海狎江隘瀆沈
舳風虎輟嘯土兕而號曠聽既收聾司音矣彼之矇矇

五色分矣駿足則縛塞服乘矣侏儒引臂上捫星矣醜
女專憐淑媛不御讎璧惠蠅踏巾首屢適郭捐遠擇潦
而步賁獲閉勇冠夫勁兮麓免折趾獵者競兮不根而
葉季為孟兮亂曰被繳之鳥載拔其翎彼實醢酒謂爾
何醒冠踰其垣導冠以登彼田不治懟鄰之耕

螢火賦

當朱明之杪月玩流螢之宵征感溫風之扇爍釀腐草
之末榮既化植以為動復緣死而遂生庶揚光於冥間

甘匿景於太陽或內照之猶眇焉旁燭以無疆謬用晦
之邃旨實自焚之為防孰潛形而更昭孰益膏而罔竭
何恒焰而不灰何炙手而弗熱彼玄宇之巧入訝明珠
之翻飛偶驚颺之散激駭星辰之乍稀羌儵明而忽滅
蓋石火之暫輝爾其代燈燭於書筵紛軒除以見掇幸
蚪蚪之與隣聚朋侶而囊括將炫赫以階危恨微軀之
難脫亂曰日月出矣爍火何為闇然而章聖哲弗譏伯
陽守黑豈適禍機

夢澤集卷一

欽定四庫全書

夢澤集卷二

明 王廷陳 撰

詩

將進酒

丁福運際昌期歌太平聖無為坐明堂奏咸池酌醴泉
餐靈芝壽萬年天與齊

解一縣諫鼓燔刑書微能錄小過

除吏廉明民安居三年耕必有一年之餘絕爭訟無嗟

吁解新不間舊愚不妬賢人不習佞朝不信讒菑害不

作和氣充然壯士服疇隴却走馬以糞其田不聞父哭

子道逢多華顛皇心大悅日彈五絃三解

閭闔行

閭闔開賢人庸鳴鼓間擊鏞貢術蓄指微哉同汲清亦
附澤鮮秣稿芟紛以供背叛腹媼逐翁如韋之矢十斛
弓俄逐而西頃却以東退乖妄侶進喪貞朋捷徑窘踈
武仁軌罕哉通孰為雌孰為雄朝譽曰堯夕詆則躋臬

妃鸞蕭艾生蘭叢蒙首以征吾將奚從

煌煌京洛行

辭我故里來遊帝鄉誰云周道險踰羊腸

解一

車馬如雲

意氣揚揚昔為奴隸今狎侯王

解二

伯兄乘軒仲父鳴璫

唱騶馳道徵歌教坊

解三

千金買劍百寶為裝風雷一擊

日星迴光

解四

朝探俠窟暮宿名娼酣呼六博縱賭千場

解五 傾財結客隱罪匿亡名齊郭解人比孟嘗

解六

對酒歌

人性稟靜躁物則準方圓錐刀各有能情好各有妍陰
霧難並祈恩怨豈兩全於此雖不容於彼獲所安人無
億萬身何能徧周旋兼濟聖不贍榮枯有自然富而如
可求尼父願執鞭

其二

惠施已不作莊生寡所宣伯牙失鍾期抱琴誰為彈知
人誠不易知己良獨難周公輔王室管蔡乃流言骨肉
且不諒他人固宜然

其三

伊呂稱大賢會合亦有因
湯文苟不逢耕釣終其身
人生一世間如風激纖塵
下者投濁潦高者入青雲
風力中不競飄轉終沈淪
得失難預謀謀之徒苦辛
聖哲皆偶然餘子何足陳

燕歌行二首

來日苦短去日長人生幾何
鬢已霜佳辰置酒開我堂
賓友雜遝進樂方繁絲哀竹
流清商薄暮移尊向曲房

挾瑟進者邯鄲倡約袖結腕清歌揚色與心知授明璫
微風蕩裾聞異香脫簪免髻玄澤光起視池中雙鴛鴦
雙星皎皎在我傍欲往從之河無梁

其二

出門何易見苦難川原鬱紆路千盤河中鯉魚去不還
耿耿思君不能言攬衣中夜坐長歎含情怨獨凋朱顏
明月穿帷照孤眠君昔贈我青琅玕我欲碎之寄君看
欲碎且止聊自寬馳光流景催歲年容色不待君可憐

恨無羽翼起雲間

白紵辭五首

高堂邃宇施翠帷
蘭膏明燭散朱輝
二八接武步舒遲
被服姣麗光陸離
彈箏鳴瑟商羽移
喜溢歡恣不自持
轉盼含嬉屬所私
累觴勸君君自知
主人既醉客不辭
燭滅纓絕珠履遺

其二

朝露未晞夜霜零
衆芳凋歇鷓鴣鳴
逝者如斯不復停

人生百年命忽傾為君秉燭縱遊行三星在戶參差明
騰觚飛爵何縱橫垂羅映穀耀珠纓衆中不言懷隱情
色授神馳流目成士女雜坐交和歌河轉參橫奈夜何

其三

投君漢濱之玉珮獻君洛浦之明璫感君提攜祝壽昌
舜日堯年樂未央為君楚舞紉袖揚乍開乍合低復昂
矯若白鵠雲中翔雕楹綺閣迴素光竽瑟會節間笙簧
樂極悲來起徬徨共指皎日輸肝腸烏白馬角誓不忘

其四

吳歆蔡謳調不同衆伶合作如一宮流鄭激楚遡迴風
嫵姿脩態紛追從人聲絲竹各競工燕趙齊秦相代供
曜靈西藏曲未終繁燈列炬亘筵紅皎如初日輝簾櫳

其五

娛酒沉歌費白日絕代佳人何可失若戀似矜態非一
持觴遞進嬌相迫左推右引使氣溢簪珥墮落寧復索
文牕朱綴開洞房錦衾瑤席施象牀五色雜組繫流黃

復帳中薰百和香層軒曲檻俯迴塘鴛鴦鸚鵡羅成行
生丁盛世福運昌四時為樂允無疆

擬矯志篇

龍虬雖困不資鱗鯁驚驚雖孤不匹驚雖雖有香草當
戶必除雖有仁人在敵必誅狐白雖美炎暑必置舟車
之用易地則棄蕙蘭不采無異蓬蒿干將不試世比鉛
刀以驥捕鼠曾不如狸餓夫獲璧不如得糜郭生純臣
魯連高士彼乃登臺此則蹈海寧直見伐無為曲全寧

渴而死不啜盜泉

放歌行

竊鈎者誅竊國者王仁義資亂道豈不臧

解一

代秦者呂

襲楚者黃巍巍國君大盜在傍

解二

謂尺何短謂寸則長

此不可度彼何可量

解三

獸殪罟裂鳥盡弓藏智勇既殫

軀乃見殃

解四

讒巧為忠直夫稱狂出門異趨毀譽曷常

解五樂不可極憂來無方游心沖虛以保壽康

解六

雜謠五首

茸茸者離而子踐之彼垣之蔓晨興灌之

其二

兔在麓蹠則逐居則肉

其三

虎嶸嶸欲食人子能棘我能榛虎自災子弧來我戈來

其四

烏母謂烏子弋人在傍汝勿啼弋人得知將汝歸我但

高飛起安能救汝為

其五

翁曰留賓姬曰無尊翁曰織絲姬曰無機

知足吟

高門耀金碧不如守蓬廬華轂錯丹朱不如乘蹇驢文
繡衣太牢雲門享爰居溢恩伏殺機隆禮與禍俱禽獸
憚為犧人知乃不如

來日大難

警變
而作

來日大難天命奈何今日為樂焉知其他

一解

遊魚在淵

其適孔多漁子餌之奄失蒼波

解二

猛虎啗人咆哮山阿

人懷禍心同室嘯歌

解三

山險可越玉玷可磨機事一失

尺瀆成河

解四

祖龍疾走逐者荆軻赫赫武皇亦有何羅

解五

嗟嗟不戒愛子操戈釋此弗殲天也則那

解六

擬古龍升天須浮雲

龍升天須浮雲今之仕者別有因察不待孝廉科不必
賢良一旦舉之牛下加之稠人族類鈎連蒙溢恩乳臭
之子被冠簪嗟彼未遇時里中豪士奴役之中人之家

恥婚媾飲宴列之為下賓并日一舉火往往釜生塵今
者銜命歸縣令負弩為先驅郡守伏道左徒御何逡巡
少長咸聚觀稍近遭呵嗔腰繫雙白璧囊貯萬黃金散
金拓第宅朝得西舍暮東鄰少年強攀附有踰骨肉親
白首牆東生下帷良已勤短衣不掩脰出沒行負薪我
聞憤憤何能平將欲叩帝而說陳天門九重河無津

艷歌行

青樓臨廣陌楊柳當牕垂飛來雙白鵲一步一徘徊

解一

今日樂相樂置酒臨前池下有菡萏花上有松柏枝

二解

與君初結婚不意當乖違讒言使親疎兩心當自知

三解

君為東流水出門不顧歸妾為北辰星終身無轉移

四解

君當萬里行妾當守中閨生歸重合歡死與黃泉期

五解

行路難五首

北風蕭蕭雨雪滂辭我親友之朔方中閨少婦走徬徨
勸君斗酒牽衣裳道路縱橫多虎狼歲暮天寒百草黃
結髮本期不下堂君獨何為慕他鄉東流之水不西歸

宛轉蛾眉能幾時人生富貴亦有命辛苦馳奔空爾為
縱令鼎食有別離賤妾但願共飭糜

其二

磁石引鐵金不連餌可得魚龍不吞蠟戟雖妍不可刺
明珠雖貴不可餐水中之車何殊陸地之船玉卮無當
不以注白刃倒持安用銛手中雖有丈八矛試之井底
難迴旋雖有輕輿駕良駟途窮日暮安能前丈夫雖有
磊落才生不逢時終蒿萊

其三

面不同兮心亦殊執一求之君何愚星有好風或好雨
世人豈得均所圖孔贊韶兮墨非樂遵叱馭兮陽回車
林中亦有嗜腐鳥海上猶聞逐臭夫此欲前兮彼則却
彼所吐兮此復鋪促席接襟議靡愜異域殊疆志或投
達人曠視任自然小儒曲士競區區

其四

忠信不獲顯衆人害其上世事風波紛蕩漾變化無方

何可狀公旦金滕功罔刊伏波銅柱師何壯周王漢帝
豈不明讒言入耳心不諒骨肉天親尚有疑他人豈得
無遷放生命飄蓬隨所向繁華誰保不凋喪何為坐歎
行復嗟鬱陶終日憂譏謗

其五

四坐且莫誼聽我促節歌路難我今四十迫衰殘盛年
一去何當還昔斥為遭絳灌怒今來豈受金張憐泰山
可移志不徙寒燼從知無再然但願長隨擊壤民優游

鼓腹歌堯年

少年行六首

幽并聞騎射閭里藉輝光朝遊從許史夜宴挾姬姜鳴
鞭當大道調瑟坐中堂傍人爭借問云是羽林郎

其二

聲蓋少年場名冠壯夫籍行人總憚塵坐賓皆避席彈
劍恥依人探丸恒借客一朝負罪逋不受追兵迫

其三

長安本俠窟烈士多英風殺人帝輦側射獸上林中金
羈及狡兔珠彈落高鴻歸就博徒飲酣歌意難窮

其四

悲歌白日變裂眦秋雲高仇家諒不釋怨吏幸無遭全
生脫虎口獲死等鴻毛豈效儒冠子終歲濡柔毫

其五

一筵揮萬金徵歌仍調舞白面洛陽童素腕邯鄲女希
意色斯升含情目相與恣歡餘萬端惟憂竭清醕

其六

應募去幽燕長驅出酒泉樓煩既已破休屠亦復殘恥
隸驃騎部豈屑輕車官歸來見天子長纓牽左賢

出自薊北門行

敵匪茹寇朔方信妖師造不祥倏承突忽鷁張逾回中
至涇陽蹂稼穡發蓋藏遭者劉奔不遑父失子女求孀
聲斷絕摧肝腸天為愁日無光不有幸罹厥殃

一帝赫解

怒命徂征方召往衛霍行旃旒揚組練明介馬馳速流

星朱燦烈玄顏蒸仗中權效先登人皆奮身命輕

二出解

鴈門過祁連煎瀚海夷天山絕累重燼毳毼殄三姓磔

兩賢谷蟲殪當戶殲斬首級如刈菅血霧鼓頭繫鞍膏

漬野骨填川檻厥魁凱以旋

三解

捷書聞不色喜庭臣賀

帝曰止嗟我軍寧無死詔扶傷兼罪已

四解

馬歸山士服

田死錄子生與錢戒軍吏勿開邊羌無過漢不先務休

息思保全罷遠戍閉玉關韜五戎壽萬年

五解

俠客篇

千金飾寶劍四牡耀朱纓東馳突西驚重諾復輕生公
子執轡請諸侯擁篲迎紹秦歸質子要楚出援兵按劍
復魯地憑軾下齊城匿跡托狗屠濟難賴鷄鳴報讎爭
結交殺人恒借名七國倚安危三輔咸震驚詭辭五嶽
移側足九鼎傾少年附高義千載流英聲安能效豎儒
覩事徒撫膺

子夜四時歌一十二首

春歌三首

東風蕩羅裾冶遊步前池柳條亦多情嫋娜學腰肢

其二

初華錦繡舒千林望如一懷春廢機杼縑素難成匹

其三

晝飲夜復宴笙歌緣底忙不是無來日但欲及三陽

夏歌三首

珍簟卧當風四面不施幃郎呼起同遊待儂著絺衣

其二

輕舟蕩雙槳，紆轉蓮塘裏。君但惜蓮花，儂貴得蓮子。

其三

腕困置扇坐，鮮桂苦汗浣。歡言勿懊惱，三伏已將過。

秋歌三首

貪看秋月光，夜久不還寢。四顧寂無人，玉堦有雙影。

其二

日日苦思君，紅顏忽成老。昔若三春華，今如九秋草。

其三

共歡種梧桐十載青雲齊百年化雙鳳來此樹上棲

冬歌三首

與歡隔溪住凝冰周四壑冰上野狐蹤歡行勿憚薄

其二

白馬雪中馳色混影難覓不知郎去路但見馬行跡

其三

對雪具清酌強歡再三進歡愛雪舞筵儂恐雪侵鬢

猛虎行

上山採樵道逢猛虎虎銜樵去置之林下樵告虎言君何不仁君得一飽我則殞身昔非有怨今何見嗔虎答樵言何哉所云子非我怨我非子嗔皇天賦性有此不仁樵告虎言君言雖辯匪我攸聞吾聞天地大德曰生騶虞不殺獨匪爾倫虎答樵言當死小犢亦何多陳三日乏食竄伏荆榛辛苦見遭奈何舍君樵得虎言仰天大叫哀聲徹雲蟲蟻惡死況乎我人願收厲氣敷和布春盡令猛獸化為龍麟

遠遊篇四首

湯谷既閤濛汜則榮朝宴未終倏忽至冥逝者不息物
理相乘願呼松喬躡景上升

其二

徘徊崑丘憩駕層城遨遊八極徧謁仙靈飲我沆瀣玩
我芝英俯視下土蟲鼠臭腥

其三

手攬羲和頓策徐行歸謁東父遂造紫庭授我神藥服

食體輕一舉萬里疾如迅雷

其四

逍遙天衢恣意所之手持桂枝驟駕虹霓
晞髮朝陽濯足咸池昊蒼徧歷懸景未移

君馬黃

君馬黃臣馬蒼蒼者驚黃者良驚馬却良馬前君當進
臣當旋

妾薄命

春風轉蕙披蘭高臺曲榭中連經堂入興張筵秦箏趙
瑟俱前鳴絃度曲雙妍輕舉紈袖襍襍宛若游龍翔鸞
翠盤金爵闌干呈能角技為歡種種厭射更端眼看陽
景西馳高張蘭燭承暉車倦馬怠不辭但歌不醉無歸
夜深坐促尊移含悰送意向誰衆中色授君知願言並
帶雙棲惡聞易別輕離佇立不勝彷徨獨宿寤言難忘
何以報君明璫起視銀河爛光牛女咫尺相望終夜不
成報章

戰城南

戰城南困城北縱橫腐肉烏鵲食一將侯萬夫死聖人
用之非得已國之守在四鄰善戰之臣服上刑佳兵者
不祥器常勝之家道所忌孤人子寡人妻獨人父母安
忍為銷戈矛滅鋒燧戢爾熊羆長不試鳴鴉逝鳳凰來
與民休息歌康哉

怨詩一章

隕葉春柯斷株懷蒂寒霰覲溫陰巖希霽頽魄愠玄駛

潮憎逝令德鮮終良辰忽替

湖上行

麗服出芳郊香車臨綠水
留連天桃下宛轉垂楊裏
妝憐草色鮮坐逐花陰徙
相攜拾翠行暫拉聽鶯止
忽驚玉珮遺時將芳樹倚
紛紛遊冶兒側目情無已

鷺鳥四首

鷺鳥化為鴈形換性亦易
有時遭故羣斂翰自遠避

其二

石苦則生我炙美毒滋多吐炙乃茹苦違欲以療疴

其三

鷄鵬運天池斥鷃翔藩籬大小各有適何用相追隨

其四

蓼蟲不徙葵水蟲不遷陸習苦翻避甘能寒豈慕燠

夢澤集卷二

欽定四庫全書

夢澤集卷三

明 王廷陳 撰

詩

詠懷三十四首

兩儀立樞要萬事具紀綱
智士運機權一童驅百羊
羽重金或輕尺短寸有長
壯夫苟失據反為豎子傷
獨繭引六鼇纖繳連雙鶴
操持貴不謬得失詎有常
始悟制

人術豈在多與強

其二

明月至無媒
朱草敷庭陰
倉卒拔劍前
眴眴愁予心
豈獨閭嘉祥
隱禍恐見侵
忌廢忍不攫
負嬰甘棄金
至貴有不欲
天屬誠所欽
美疾雖可甘
徒使百毒淫

其三

昔有亢桑子
寄身畏壘居
臣妾屏仁知
甘與朴累俱
三年國大穰
歲計誠有餘
閭井戴其潤
謀欲俎豆予
聞之

悵不懌奮起逃空虛豐施不食報道化超黃虞季葉驚
功利畫挈矜一隅

其四

人生本殊方神範各有宜參錯獲一致妄鑿乖天倪
脛續則瘁鶴脛截則悲拇駢決則憂指枝嚙則啼匙劣
不假益羨溢豈無虧紛彼便嫫子作意相追隨智殫力
云匱成理曷能移

其五

狙捷反見執豹文乃來田鸚鵡舌為災翡翠羽自殘醜
惡非可居才美適禍端置身當何所材與不材間貴寵
安足希庶以盡吾年

其六

天網掩八荒翔走盡其曹大人操利刃揮網使奔逃殺
獲豈不多貴有疎釋條渾沌鑿已久胥庭徂復遙刑書
代附益權家紛蝟毛跬步置一戢荼苦動見遭民窮詐
轉出獸窟恣咆哮介者不慕飾胥靡豈憚高無令自棄

民生此全盛朝

其七

儒生峭崖岸抗顏論詩書
磬折周倫類直方向朋徒吐
辭厲信義皎日耀天衢
外表高潔談腹內蘊穿窬
命侶發瘞子探口出含珠
金椎碎腐頰青青歌應臚
聖言豈不偉反為行劫需
誦說苟非人階亂豈勝誅

其八

擊鼓以求亡疾馳以逃影
驅介以乘高驂蹇以求騁
揮

又喪其柄振衣失其領趣舍昧良圖存亡在俄頃

其九

軒后謁大隗肅駕登具茨徒御總聖靈中道迷所之
邂逅野童再拜稱天師仲尼大聖人未敢輕小兒神智
有不通穉齒抱真知咄嗟世路子恥問甘蓄疑終身昧
太行皤皤良足嗤

其十

民食美芻豢鳴鳶甘臭陳西子豈不都魚鳥不見親萬

類殊所嗜物豈慕非倫箕畢各有好況此世上羣情欲
孰為正參差何可均黜智任自然悠悠葆天真

其十一

夸名非已有禍患在須臾生命無延期昏旦有不虞拂
衣舍之去矯步升天衢陟降太微堂上帝授靈符六氣
備朝餐雙蚪結颺輿消玉饋我漿憑雲構我廬聖貞進
杯觴靈妃奏笙竽三光代列炬四海注一盂抗臂抑羲
和六龍且徐徐微瞬朝市易日月曷云除名漏泰山錄

鬼伯無迫驅舉手謝世人安能與爾俱

其十二

里中有一士栖栖蓬戶間動依高士跡居誦先民言
中無斗儲桁上衣無完藜藿并日得續絮豈禦寒伏臘
祀每廢妻子顏苦艱常恐志節虧不屑親知憐入門四
壁立顧之絕愁嘆饑食拒嗟來渴飲避貪泉一簞恒晏
如回也稱大賢

其十三

姬旦制冠裳萬古承其賁偶以衣狙獠奔騰裂且棄承
雲本妙音鱗羽爭辟易魯門鐘鼓聲轉使爰居悸物類
何繽紛人已非一致肆哉尼父言盍各言爾志

其十四

曜靈倏西沒圓景承其輝飄風蕩層雲零露忽已晞急
節不可淹大暮焉能違天象會有復嗟哉人命微怵惕
積湯火榮名非我希幸不嬰網羅何用起高飛安接浮
丘公執手升雲軿玉醴對坐傾瓊華聊可噉

其十五

京洛冶遊子浮湛聲色場青驪服文輿丹組綰羅裳
翱翔狹邪間順風揚芬芳高堂置廣宴曲榭開閒房
分曹效百戲作使徵名倡良庖膾肥鮮珍饌溢圓方
朱華忽西逝蘭膏嗣其光客醉賦無歸宵分歌未央
為樂自今日千歲固其常安能轉多忌歎息懷虞殃

其十六

甘辭背德義盡言招罪尤效忠主未諒施恩誰見酬
直

道鮮所合險路焉可由民生媚其朋玉石各有儔舍此
但安坐芳時忽我遁去來固成理乖合非人謀灰心置
計較遺棄親與讎去適無窮野超世離殷憂

其十七

達士志慷慨貪夫思保全有身則有患消散固其然伏
波甘馬革莊周快烏鳶用意非一趣大要歸明賢愚者
闇桑榆鬱鬱坐自煎思慮損眠食恐懼懷冰淵蹙蹙向
賓客劬勦終歲年多圖寡攸成繁辭累其愆展轉不獲

紆齋恨寐重泉木槿榮一朝日夕用長歎

其十八

河清不可俟川逝誰能止朝露忌太陽夕日愁濛汜歌
舞化塵埃都邑生荆杞大運厄陽九銷毀固恒理填海
精衛勞逐日夸父死齊景悲牛山晏嬰笑未已彭殤孰
短長無生悟方始

其十九

梧宮肆詰辨齊楚兵始連弦高犒晉師鄭國賴以全齊

樂不可犯范昭知有賢誰云制勝術乃在樽俎間君子
慎幾微禍福基一言覆水各自流事去誠可憐

其二十

疑似不可涉李下與瓜田母言出婦口雖當未為賢周
公功信偉二叔反流言實沈與閼伯日起尋戈鋌骨肉
尚不免何望他人憐夜玉至無因匹夫按劍前鴟鵂據
腐鼠仰視嚇鴟鸞苟非明君子安能弭禍端感彼采苓
章勗哉其舍旃

其二十一

處世悵悠悠結交誠草草舳舻濟重淵璣衡測穹昊人
心懷嶮巇對面施傾倒莊惠亦有疑張陳終莫保托身
恨已晚知人苦不早揮袂去人羣採芝歷雲島

其二十二

言笑色雖親致毒乘其昧一旦弛周防勺水成湍瀨禍
亂在須臾何有細不大收視後者鞭蟋蟀思其外舟壑
竟難恃軒駟何足賴先民亦有言高明鬼所害慶弔非

異門驕蹇詎能會

其二十三

元化運天地碩輔須英雄草昧若無侯大業何由隆匡
時各有人如雲附飛龍二八贊虞庭胥靡翊殷宗周公
出天屬鼓刀應非熊為猷苟切施踈賤靡不庸下世快
舉肥斥異多引同豈乏個儻士無媒終固窮

其二十四

僂僂信無當躑躅常苦憂傷哉世路交同源終異流執

手愛不淺轉面起見讎傾側忍負欺怨毒生綢繆彎弓
日相向乘利來迫道薛公一獲罪賓客誰顧留炎炎廷
尉門灰冷令人愁胡越使相為安危在一舟輕薄市中
童反復誠獨羞煩思發憤懣自茲絕交遊

其二十五

日月亘天塗照耀各有時榮枯若循環智巧難控持賈
生愁遇鵬莊周憚為犧糾纏誰不嬰文繡焉能辭放言
用自慰虛無誠我欺得失去來間此叟迺深知

其二十六

昔聞有遊女逍遙翔碧潯交甫下請佩解贈情亦深可
遇不可持變化愁予心影滅佩亦失漢廣無由尋眇睇
絕髣髴徘徊逮夕陰青鳥忽來過貽我金石音憂思耿
難忘寫意於鳴琴自傷非儔類感激長悲吟

其二十七

愚公亦非昧智叟未為得獻疑親反嗔贊詭踈為德大
人計億代俗士愁日昃通蔽鮮一致損益非易測

其二十八

忽忽行欲暮
遑遑復何之
征馬立踟躕
遠道安可期
霜霰被原野
北風吹我衣
孤鴻飛且號
虎兇夾林啼
崎嶇不獲騁
徒旅長嘆咨
回車亦已晚
失路良可嗤
嗟哉客遊子
念此早旋歸

其二十九

窮達有自然
鬼神柄其施
安坐值渥恩
周旋失所宜
佩玉乃不兆
壓紐襁抱兒
上卿屬稚齒
郎署淹龐眉
巧宦

目馬安斯言恐亦非豈無多智人往往困蒿藜

其三十

蜉蝣不知夕楚楚矜衣裳人生若塵霧覩茲立傍徨世事沓而至心力若不遑運往悵莫追憂來嘆無方智巧雖百出得失亦相當少壯與時逝精神自彫喪逼此悔恨生稅駕名利場按牒訪芝草天路期翱翔列仙非我儔瑤水邈無航俱置勿多畏恬澹安其常

其三十一

中歲獨玩世蕩志娛絃歌婉孌思一顧輕薄日來過妙
舞進北里姿媚趨狹邪資用每不瞻謗議橫相加茲年
忽醜老讐禍悟已多昔人重知非慨嘆今如何澡身祛
垢氛考室潛巖阿幸不即徂謝庶得附龍蛇

其三十二

茲歲忽云暮駕言出城闐楊林翳白日岡岑蔽玄雲荒
原離獸馳寒鳥鳴索羣上有百尺臺下有千古墳登高
一騁望思我平生親延佇久不至俛仰懷酸辛萬物靡

不化千載猶茲辰驅馬復來旋詠歌聊飲醇

其三十三

猗與雄傑士猛氣蓋八埏出身赴國難受命不遑安左
臂引烏號右手提龍泉臨敵試一呼萬夫却走還先聲
四海沸壁壘俱破殘旄頭化石隕天吳蟄重淵西北淨
邊塵東南蕩蠻烟茅土非所希貴使威靈全長揖返故
廬功高何足言

其三十四

至人處斯世忌為人所知十漿五先饋列子驚且疑避
竈不足貴爭席乃庶幾大白每近辱卑濁良可棲豈效
夸毘子作意矜容儀結束轉自媚姿態令人悲髭塗飾
軒轅步趨陳采齊危冠禮迂士褒貶厲嚴辭媿媒不敢
干矯志逃世譏皎潔難久居青蠅忽來隨哀美孰云亮
毀譽在一時敗軌屢相縈遭躋當路歧

壯士篇

少年學劍術英風聞九州慷慨出門去辭家將遠遊遠

遊欲何之炎荒為我仇昨聞遣飛將召募何時休國威
有不揚無乃壯士羞奮矛如迅湍拔距踰亭樓猛氣伏
羆虎騰躍捷獼猴置身百戰場妻子不顧留性命良足
憐聊以紓主憂揮戈盪蠻烟飲馬江漢流餘勇萬人賈
雄傑無匹儔功成獻明庭賜爵位通侯

遣興三首

八方異風土百里殊陰晴中外殆天設終古難合并權
家但好勝持議乖羣情孤軍病深入問罪慮無名客主

既不如師老功難成常恐强弩末遂令小國輕安得長
者言立談罷交兵皇惠均萬物各各遂其生

其二

南裔雖一區嶮阻紛可憑民居寄谿谷霧雨常晝冥妻
子像蛇虺魑魅冒人形沙蟲潛射影觸之喪其生古來
稱絕域何足煩天兵吾聞王者師無戰唯有征一卒不
備歸良已虧威靈地於東南缺天乃西北傾二儀有不
足并包人豈能

其三

高宗伐鬼方三年乃能克不聞徐方來允在王猷塞耀
武與修文收效孰為得試看古戰場春雨生荊棘

眺江閣述懷

偶遣丘中步來眺江上閣樹裏呂王城草邊邾子郭遺
宮隱莫尋往牒恍難托春深苦竹滋秋高白楊落故堞
啼早鴉野田噪暮雀頗為樵牧資焉免狐鼠虐雍門哀
有餘九原何可作

雜詩九首

絺綌寒不求，纈絮暑不御。當其不切施，棄置若弗顧。時節忽復及，效用乃如故。冥運不無代，物理豈常遇。功成互見奪，乘時各有驚。嗟哉團扇姬，怨歌良已誤。

其二

手持一杯水，覆地東西流。榮悴有自然，萬卉同一秋。翩翮者誰子，作色矜遨遊。朝見馳華軒，日暮歸山丘。憂來不可知，為慮何能周。貪夫昧成理，磬折將焉求。天命無

改施智巧誠足羞

其三

日月競馳邁一夕復一朝臨鏡失故吾壯心潛已消聖
朝棄賤士九牛亡一毛豈不希末榮所苦術不饒無能
令身貴何為使心勞莊生誠我師大鵬寓逍遙

其四

獨處忽不樂理棹凌洪波巨石何澆灑魚龍駭經過舍
舟復安適改軌登山阿木魅號夕風猿猱一何多禽蟲

饒怪形林谷聲相摩失路積憤懣逝景忽蹉跎雲中可
遊遨乏翼將如何

其五

漢臯有遊女揮袖凌風翔俯身拾翠羽舉步振雙璜芳
華耀朝日皓質凝秋霜嫣然惑陽城婉孌切中腸將來
恍復旋何由置蘭房徙倚通精誠青鳥逝我傍揚聲致
殷勤再為申禮防徘徊湍瀨間綺麗不能忘

其六

無得亦無失喜來憂患乘崇高帶傾覆陳根吐鮮英反
覆開存亡臭腐舍精靈如何聲利徒僂俛趨譽名季子
竟車裂累印何足榮李公具五刑悔令遊說成賣主愆
自招上書誰為明萬事有不虞逍遙可長生

其七

芳春驟青驪遨遊楚江濱道旁若堂封云是呂王墳衢
路化陌阡臺館盡燒焚陰風嘯寒鷗古隧翔狐羣牛羊
牧其巔凌藉日繽紛生存華屋居嬪妾從如雲一朝寢

重泉貴賤何由分
龐公困隴畝耕稼良已勤
誰知千載後史冊播餘芬

其八

中園種桃李不言下成蹊
凝霜被原野零落愁安歸
盛年有銷鑠窮達在一時
便嬛途路子俯仰乍榮輝
夸名何足賴怨毒常苦滋
靈龜歡在塗雄雞憚為犧
膏火忌自煎斯言誠可悲

其九

義和馭六龍馳光耀萬里一潛濛汜間沉淪不自理楚
宮在昔時繁華照江水歌鐘日夕聞閒榭屯羅綺運徂
謀亦屈巍構積傾圯當畫狐兔翔洞房生荆杞朝雲不
可招逝者誰能止流觀天地間庶悟達生旨

別張子言四首

我友駕言邁去去之朔方晨起趣中廚為我具酒漿長
別在須臾且願盡杯觴昔為骨肉親比翼雲中翔今當
永乖違邈若參與商出門異鄉縣居世如朝霜世途轉

傾側良會安可常羸馬感人情哀鳴衢路傍悲風振喬
林瑟瑟傷肝腸執手不能辭淚下霑衣裳恨無凌風翰
送子還故鄉

其二

故鄉豈不思臨發中徘徊借問欲誰須重與心知違山
海高且深見面未有期有懷今不盡相思亦何為豈無
絃歌曲調促令心悲立語未及終白日奄忽移安得魯
陽戈揮景使東馳

其三

馳景不少待客子何可留相送不覺遠行行至河洲中
有雙黃鵠飛鳴諧匹儔驚風揚洪波散失焉能求雌雄
相背飛影響日以道鳬驚豈不多嗟哉非我仇願言樹
萱草以解心煩憂

其四

煩憂動我神悲歌仍躑躅鬱鬱道傍柳垂蔭昔何綠嚴
霜日夜零枝葉不復屬四時相推斥變化一何速俗子

驚聲華世儒矜結束立身多所乖年命傷局促子其愛
景光抱道在白屋

別張子魚三首

斷蓬隨天風飄轉雲中遊豈不戀本根一失非我由矯
矯雙鴻鵠高飛命其儔獵子隱側目橫絕焉可求托身
貴得士安卑義所尤之子遠行邁棄我不顧留思欲並
子濟漢廣無方舟

其二

鳴鹿在中野獲草求其羣嗟哉昔所歡一散如飈塵虞
卿棄相印擔簦徇情親悔吝不自惜義聲流千春此道
息已久遺響誰為申子其懷璵璠慰我多苦辛

其三

霖雨積旬朔義和光不垂荊棘被廣野潢潦生中達客
子阻遐征太息當路歧策馬從子去駕駿馬可齊君羽
等飛鸞我質類栖雞同袍異羽質去留長此辭

閨情二首

種木期息陰結交期得心與君初婚時安坐調瑟瑟繫
我大秦珠貽我玳瑁簪攜手同車遊徘徊步春林俯拾
並蒂華仰聽和鳴禽折芳交贈持言誓一何深寧期被
讒妬棄我忽如沈曠歲不一接塵埃生錦衾明月入空
帷中夜坐悲吟發篋理故物淚下誰能禁故物猶光彩
故心人安在疇知恩愛移不俟顏色改

其二

端坐結憂鬱逍遙出中閨丹榮冒陽林流泉激清池孤

鳥西南征遺我鳴聲悲攬衣起相從迅影不得追踟躕
立庭隅目送浮雲馳雲馳風為驅風返雲亦歸君恩中
道還慰我恒渴飢

別曹仲禮四首

與君一為別晷度逝不停奄忽二十載親串日以零短
者已物化存者非壯齡況復異鄉縣散處如晨星但言
長相思豈意今合并顏鬢各已改不易惟茲情孤鴻號
朔風黃鳥聲嚶嚶飛鳥戀儔匹況乃稱友生

其二

別子大河側見子長江濱對面但疑嘆含意慘莫陳豈
無新知歡念此同袍人扳留不須臾義陽忽以淪奮身
思繫日天路邈無因安能附高翮一舉摩青旻飽者豈
念飢貴者羞賤貧薄終古所尤交誼貴在伸故心苟不
移何必會合頻慷慨即長路無為兒女仁

其三

中夜起相送白露塗我襟低頭惜分手舉頭傷辰參斗

酒良不薄對之不能斟唧唧草間蟲助我揚悲吟為君
拭綠綺彈作清商音物理闢人情淚下不可禁谷風刺
小怨孔公贊同心延陵輕寶劍高義垂至今親交信不
薄先民良可欽

其四

泠泠山下澗童童山上松磊磊澗中石瑟瑟松上風波
逝石不俱颺奔松莫從物理相倚藉動息難可同與君
遊宛洛矯若雙飛龍中道悵相失末路欣此逢既逢不

須臾去復當嚴冬霜霰集衡軛虎豹啼林叢子其慎桑
榆勞謙以令終

園亭言懷

駿死骨誰市象焚齒自累棄置悲團扇齟齬嘆方枘恥
隨荆橘化樂與魏瓠棄素無金張援焉取丘園賁農圃
衍世業桑麻綜歲計實飽三士桃芳引八公桂春原露
未晞秋臯霜已被偶緣物態感遂與神理契晷度無能
淹金石亦善敝願言齊得喪庶以紓勞悴

歲暮雜興十首

年往志亦減，譽來毀乃加。
遂初困無悶，善後生有涯。
永年慕樗櫟，存身悟龍蛇。
大隱但城市，嘉遯豈烟霞。

其二

孔公深贊蠓，賈生虛忌鵬。
屈伸在一時，憂喜本同域。
河清豈能俟，途窮安足哭。
久息漢陰機，莫問成都卜。

其三

一斥壯齡改，相知白首疎。
干時計轉拙，好客資苦無。
飯

牛當落日牧豕入平墟行年忽老醜何意逐名譽

其四

人情皆喜新世路惟嘉壯鵠寵遠見珍薪積後居上前
魚龍陽悲遺簪少原悵盛年亦有移溢恩何可仗

其五

寡欲處易安抗行俗難合巢林祇一枝繞樹猶三匝竟
日伯陽書經年幼安榻閉門客座空啓徑朋簪盍

其六

昔惟樂遊衍今已識耕耨連畛東陵瓜一頃南山豆坐
久林壑暝歸晚妻孥候倚樹見墟烟就枕聞山溜

其七

日月處無恒俛仰情非一蟠泥乏龍德悅草愧羊質周
周尚慮危鷦鷯猶慕匹紛紛馳突子何不虞顛躓

其八

偏才互短長名家殊去取連城償燕石千金享敝帚不
識東家聖翻謂西施醜定價豈目前知已俟身後

其九

讒毀行見迫愁思坐不開含垢長者仁懷璧匹夫災在
鳥愧能言處木甘不材終謝金籠閉幸免匠石猜

其十

景曜一何速志業百未酬所願則學孔吾衰不夢周智
愚各有營貴賤孰無憂松子久我期萱草為誰求

再呈張子五首

我歸指春暮首夏尚梁城偃蹇輟孤嘯夷猶滯遙征憶

山憤屢積卧痾感易盈促促變昏旦栖栖感晦明

其二

良知念化離旅寓枉漂泊連榻任縱誕駢筵展戲謔儷
步循廣除偶睇散層閣志意攢縷悰憂患祛緒樂

其三

淒淒白頭吟熒熒瑤華音睦耳親暱談寄致翰墨林朋
探耽散帙丘憇憶鳴琴賴茲君子侍可愉浮客心

其四

結髮事圖牒壯齡重交遊章甫不越適明珠無暗投
儻俗寡和齷齪余恥仇晚有二三士相與締綢繆

其五

趨途互顛躓鍛羽各參差詎知會無因枉作生同時
公組竟不縲我榮亦已遺修辭與明德努力副前期

憶舊廬

今羈變節候昔棲曠林丘蘋風浣秋岸花暄麗春洲
林端赭圻折屋際玄霧流撫景足自媚寡欲罕外求
一朝

嬰塵慮十年事遠遊山中冷叢桂海畔驚羣鷗龍性乖
馴擾鶴姿愜清修初服忤久違華簪歡早投巖想偃荆
扉渚忤驚蘭舟倦翰飛屢憩駭鱗逝無休此語難俗聽
探懷授良儔

詠秋泛

鮮曦登首秋緒風革闌暑孤嶼濺驚湍輕橈驚蒼渚
寒隱汀菱荷哀映浦披拂枉黃緣維繫乍延佇
寒隱汀菱荷哀映浦披拂枉黃緣維繫乍延佇
菱荷哀映浦披拂枉黃緣維繫乍延佇
菱荷哀映浦披拂枉黃緣維繫乍延佇

縷翻鱗鯽銀絲剖俯睇忤虬潛仰盼愧鴻舉泛梗傷在
今乘桴豈獨古

荅馬子

昔予棲金馬偕子謁彤闈秩俱晤不闊願愜契無違追
尋屐偶歷招要盃遞揮夕談朝日上晝吟宵月輝振雅
祛凡響抗志領時譏衝飈忽中激垂翅各分飛余征赴
梁旬君徂出晉畿不惜謫宦苦但愴良覲稀青蠅既點
壁緇塵仍染衣怨吏歡入弃哲人吟見韞枉子尺素問

增我百慮依撫今
覬昔娛忤物悟已
非願言謝人徒北
山行採薇

歸故園作

浮輟厭羈羽歸驂謝飄蓬
桑梓無改植阡術有遺蹤
敝構仗先宇餘築存故墉
岫松增穉株林篁茂子叢
霏霏薜荔雨搖搖菡萏風
招要山中人追尋河上公
登挹九疑嵐卧聆七澤淙
往歷勿重陳偃蹇敦所崇



夢澤集卷三

欽定四庫全書

集部

夢澤集卷六

四至

詳校官中書_臣葉元符

中書_臣劉源溥覆勘

總校官進士_臣朱鈐

校對官編修_臣潘曾起

謄錄監生_臣周敦復

欽定四庫全書

夢澤集卷四

明 王廷陳 撰

詩

送倫子畢娶歸

君不見倫氏之子才絕倫
少小屬文如有神
風雲獨奮九萬里
身世初經二十春
獻賦朝趨北闕下
上書暮歸南海濱
誰知弱冠親迎客
已作君王侍從臣
珠明玉潤

元相媚苑柳宮花春自醉霄漢翻為奠鴈行鄉閭競訝
乘龍至烏鵲橋邊問石年鳳凰樓上吹簫地富貴婚姻
慶非小文采風流古來少花燭初從華館張鑪烟屢夢
清班繞當朝爾是歲星魂避世還來金馬門他年割炙
詆諧日方朔重沾漢主恩

發裕州短歌

點卒前來意氣雄當堦縛我囚車中颯颯驚飈動地至
城捲赤霧摧丹楓城中之人走相視城外蕭蕭嘶曉轡

道上殘楊掃凍帷過鴈鳴蟬雙迸淚人生作吏何大苦
囊無一錢身被虜可憐妻子盡畏途南征白晝愁豺虎
古來玉石怨俱焚骯髒安能就珪組

聞子言消息因作短歌寄贈

憶昔江楓赤葉下含悽別子城之隅買舸遙尋沔陽守
張燈夜宴郎官湖宴罷迢遙歷鄉縣行邊宛轉隨游衍
過境能令車馬迎歸途翻為鶯花戀大梁才子更相畱
平臺大雪揮金甌囊裏贈金快意盡聞君累月醉青樓

春生始渡黃河岸入門妻子親為爨壁上龍泉今在無
因歌長夜何時旦楚客相思不記年尺書無復到南天
江馬故人祿苦薄寂寞誰當送酒錢江上忽逢燕地客
停杯問訊悲今昔丈夫不仕空有才世人誰識文章伯
況子丹房已屬人茅茨低小莫容身堂前燕雀俱飛去
洞口靈芝祇自春

胡生行

廣陵胡生少且孤十五已作奔竄徒踪跡彷彿不可詰

向人長跪乞為奴苦遭惡少相窘迫飲令行酒乘前驅
片語不投怒詈起鞭笞竟百臀無膚季布髡鉗不辭辱
范睢折摺仍見拘夜半羣奴解其縛生也遂得踰垣逋
頃來江上始一見造次能將書自薦畏途倚藉即交親
杯酒酣歌忘貧賤乍喜仍愁若病狂忌言往事慚顏面
從來龍性不可馴須知豹采終當變三年展轉客浣川
浣川人士盡相憐卓家文君正新寡琴中疊奏求鳳篇
共羨名姝諧賦客俄驚碧海變桑田恩情中路忽棄捐

白頭之吟誰為傳
泛梗飄飄貪別浦
浮雲冉冉向遙天
人言胡生太不才
我獨念之增悲哀
男兒失意無好醜
高名自古為身灾
故將踈放取嘲笑
吁嗟俗議真愚哉

憶昔行寄張龍內翰

憶昔赤壁張華筵
與君共醉長江邊
白鳥飛隨金馬客
蒼苔坐嘯赤墀賢
豈知雲雨歡不延
尊前紅日墮山川
予逐白雲歸楚澤
君隨明月上青天
天中謁聖人獻納
為近臣馬遷石室羞
前史方朔金門見
後身鸚鵡洲邊

忽分手鳳凰池上頻回首但使同心各一方何須對面
銜杯酒俱稱賦客異升沈臨風三復白頭吟相如未逢
楊得意漢室誰當奏上林

楚岸吟寄牟子

楚岸長楊垂至地百鳥嬌啼春自醉晴絲冉冉墮碧空
風光頗為遊人媚我家黃子國君住鄂王城大江東下
雲霧接滔滔應瀉故人情憶初同領南宮宴白馬青袍花
映面本期霄漢並翱翔寧知世路多更變我歸十年前

君歸十年後榮華顛倒若夢中人情翻覆無不有安能
顧墮甌自今心不開陰巖積古雪白日何當來我將振
衣從子遊請君洒掃鸚鵡洲遲日經行挑竹杖烟波搖
漾木蘭舟須令漢水變春酒更遣大別為糟丘蛟龍自
吟鶴自舞仙人鐵笛沈高樓留連坐待明月上翠娥勸
飲來沙頭竹林諸賢真瑣瑣高陽酒徒安足儔吁嗟此
會難即使我悵望無時休君不見楚宮寂寞臺殿荒
歲歲東風開野棠三閭顛顚行吟處千古猶傳杜若香

丈夫眼底安足計君行采采莫相忘

寄曹仲禮

吁嗟梁甫吟何哀白日黥慘浮雲迴繁華忽與東風別
幽壑不見陽春來憶初謁帝承明廬頗將詞賦追相如
意氣當時惟爾我文章絕代互吹噓正逢漢武勤邊畧
同奏文園諫獵書杞國憂天傾傍人笑為狂精衛枉銜
沙何裨海茫茫雷雨晦冥起倉卒散失非我能周防寧
知垂翅青天後虞羅獵矢猶徬徨予仍下獄大梁城謗

議雷同真吠聲全生虎口信不易一死鴻毛良可輕推
眉覩面復苟活跼天踏地長悲鳴前榮後枯嗟世事翻
雲覆雨見人情昔日結交二三子張口欲言禍及矣請
兵誰為哭秦庭擊筑何曾歌易水感君山嶽心不移張
公神劍合有時矯首南天瞻北極聊持芳草寄相思

張公行

張公一生豪俠徒作吏風塵性氣麤千金快意買歌笑
禮法區區安足拘傾心倒意向賓客椎牛置酒恣歡呼

忽傳姓字坐沙汰歌曲未竟門客逋昔時請謁為親者
倉卒化為越與吳已經十日伏草莽欲去不得仍躊躕
我聞拔劍為子起仰天疾視情無愉世間萬事盡雲態
白衣蒼狗在斯須神魚陸處困螻蟻驚鳥翻身避獵弧
李廣有時愁醉尉魏其何能庇灌夫古來豪貴有顛倒
張公張公莫嘆吁

寄嘲江子

江生突兀揚文風千奇萬怪難與窮博物豈惟精爾雅

識字何止過揚雄古心已出丘索上遂旨或與神明通
求深索隱苦不置一言忌使流俗同令弟大篆逼鐘鼎
絕藝恥作斯邕等生也為文遣弟書一出皆稱二難並
縱有楚史不可讀滿堂觀者徒張目少年徃徃致譏評
生也不言但捫腹君不見好醜從來安可期豪傑有時
翻自疑伯牙竟為知音惜卞氏能無抱璞悲請君實此
無易轍聖人復起當相知

東湖書院歌

東湖之岸雲樹林仙人樓閣長陰陰秋濤春漲巖洞坼
風宵雨晝蛟龍吟久從斑竹聆湘瑟更向蒼梧訪舜琴
蒼梧一去三千里明公突兀高門起富貴天涯重首丘
歲時堂下悲流水疊疊尋源苦不置悠悠注海情無已
故渚今池宛相似卜築題名總為此此地移家幾十秋
風光如在楚江頭誰云信美非吾土委心大觀皆虛舟
已成新第象桑梓更營別墅依汀洲神臯與區表靈異
迴溪複嶂圍深幽花竹豈徒恣蕭散宮牆直欲備藏修

諸生四方遠親就羣書萬卷紛校讎縣鐘待叩有餘響
提刀迎解無金牛橫經獨擁臯比坐乘興時披鶴氅遊
達者升堂許游夏愛客掃徑延羊求一丘一壑豈足繫
時止時行不自由懸車欲卧弓旌迫鳴騶已出亭臺留
千年科斗守篋笥四時猿鶴司松楸只今霄漢夢江灘
覺來枕簟失風湍山中悵憶八公桂澤畔空懷九畹蘭
四海蒼生未肯釋何日東山歸謝安

豪士吟贈王氏

君家高樓臨漢水落日悲風白雲起門垂楊柳千萬株
長條直拂洪波裏我來繫舟古楊下秋深岸束蒹葭靡
此時歸思正鬱陶偶爾逢君行且止邀我置酒開綺筵
庖子擊肥兼割鮮海榴新擘寶房碎湘橘旋摘金子圓
翠袖成行獻歌舞授色知心次第前堂中食客多且賢
寶刀錦帶光接聯持觴遞進勸我酒四座為壽俱萬年
平原十日飲未足白首酣歌凌紫煙自矜膂力莫與伍
俠氣翩翩尤擅武角弓十斛左右張蛇矛丈八盤旋舞

樞上生駒六駁姿猛士如林不敢騎控鬣鳴鞭一躍上
疾馳緩步衆稱宜男兒身手有如此壯節奇功皆可為
君不見道阻天寒行旅苦水有毒蛟山有虎請君殺蛟
兼射虎惡少紛紛安足數

觀秋江晚渡圖歌

大梁五月成淹留披圖忽憶瀟湘遊眼底蕭條動秋色
誰驅楚澤來中洲烟霞掩映蒹葭郭鳬鵝點綴清虛閣
敗葦荒蒲豈雪霜崩崖圻岸迷丘壑岫口黃花幾歲開

楓頭赤葉何年落數舸依依古渡邊細聽那聞呼渡傳
風帆浪楫兩不動中流竟日空盤旋晝短天寒洞庭濶
幾時可到蒼梧巔松根一叟長箕踞暝色沙光自猶豫
蛟龍夜蹴濤如山公無渡河且歸去我家住在江之濱
十年落魄厭京塵飄蓬海內渾無定沮溺嫌予數問津
對此躊躇心目斷丘也東西南北人

醉贈李道士西歸

尋師初到赤松家愛客聊停白鹿車皓首龐眉並園綺

向予歷歷道生涯早入匡廬尋五老晚從嵩少採三花
花下開尊玉液濃尊前拂檻紫芝重雲裏碧簫呼彩鳳
洞中丹竈護蒼龍蒼龍彩鳳相催促欲上空虛謝塵俗
緬懷紫氣沒流沙便訪青牛度函谷函谷迢迢萬古存
伯陽一去幾朝昏到日如逢關令尹仍留道德五千言

夢澤集卷四